

EUANGELIA MAREKO DETARER.

¹ Abele ditimedilu Iesu Keriso ra debe merkem, Ade ra Uerem.

² Mokakalam gaire perofeta detali, kega, Kaka emarida karbara merkem mara op, ko paret mara gab;

³ Le kodo ereretikri soqe purge, kega, Paret Iehoua ra gab, barditug abara gab giz.

⁴ Ioane ko bapataiso abele soqe purge, a marau bapataiso ra obazgeda ko detue adud giz.

⁵ Iako abim bakeuare le Iudaia uridili, a uiaba Ierusalemalam, E uiabi bapataiso uridili, abele Ioridano dodo, uiaba detaut uiaba adud giz.

⁶ Kamela mus Ioane ra am uali, abara uak kau ra paura; E pem ereg a isas ra sumes are:

⁷ E marau, kega, Nerute kara sorge ekas adigir kari tumge, kaka nole abkoreb eparisili a detue abara teter gab mukub.

⁸ Kaka uabi bapataiso nilam; E dali uabi bapataiso Lamar Zogolam.

⁹ Abele kerker ge, Iesu ekasereder Nazaretalam Galilaiage, Iesu Ioane de bapataiso abele Ioridano ge.

¹⁰ E nilam ekueilu, E egremalu kotor nakesmulu, a Lamar Zogo epereda abi tumge, mokakalam dibadib:

¹¹ Iako kodo mer uataba kotorlam, kega, Mama kara Uerem nasge, kaka mari sererege.

¹² Dudumge Lamar Zogo abi emarida soqe purem.

¹³ Foate gaire gerger E soge purge emeri, Sataana de abi mirem; abi dog gaire ebur marmar; angela giz abara memeg.

¹⁴ Emetu Ioane didbari, Iesu bakeamulu Galilaiaem, ko marau Ade ra debe merkem, kega,

¹⁵ Kerker ge tabarki, a Ade ra baselaia maike; uaba obazgeda, a debe merkem oituli.

¹⁶ E ekas keper dege Galilaia, E dasmer Simona a Anederea tabara keimer net gurem dikri: abelelam ui darali umele larem.

¹⁷ Iesu ui darali daratager, kega, Kari narmili, kaka uabi depegemelu ko le asaperem.

¹⁸ Ui darali dudum net dekaerei, a abi irmilei.

¹⁹ E ko kebikebi ekasereder, E dasmer Iakobo Zebedaio ra uerem, a Ioane abara keimer, nar ge muigi, a net euelei.

²⁰ E sobkak ui darali ereretikrei: ui darali Zebedaio uiaba aba dekaerei nar tumge, a gaire memeg, a abi irmilei.

²¹ Uiaba Kapernauma tabakeuare; sabbath ge E dudum sunago tabao, a ereuerem.

²² Tabara ereuerem uiaba damered: abelelam E uiabi ereuerem mokakalam le pardale, a nole mokakalam aotale giz.

²³ Nerute le nagri sumes lamar muige abele sunago; E ereretikri, kega,

²⁴ Iesu Nazaretalam, keriba nako marim? nako, mama tabarki keribi adem dipit? kaka mari opasereret, Ade ra Zogo.

²⁵ Iesu abi daisumdal, kega, Bamer, a teosmeda abielam.

²⁶ Abele sumes lamar abi ezagri, a au ereretikri, epe teosmed abielam.

²⁷ Uiaba uridili damered, a mer atager, kega, Nalu pedali? nako abele kerkar ereuerem? abelelam sumes lamar giz E sirdam adigir, uiaba abi asoli.

²⁸ Epe sobkak E ekoseli gaire ged ge Galilaia deraueili.

²⁹ Uiaba teosmeda sunagolam, sobkak uiaba tabarot kemem Ioane a Iakobo metaem, abele Simona a Anederea ra meta.

³⁰ Simona kosker ra apu uteid, gem urueri: uiaba sobkak abi etomelu.

³¹ E keitekas abi tag erpeilu; sobkak urueri dekaida, E uiabi memeg le.

³² Kikem, lem baraigida, uiaba abim taraisare gaire, gim le, a gaire le sumes lamar nagri.

³³ Gaire ged uridili netate gedim op meta.

³⁴ E idigiri gaire tonar gim le, a imuda sumes lamar giz; E nole gaire demoni emarida ko mer egali, abelelam uiaba abi opasereret.

³⁵ Nede be iuaokaer, E ekueilu a teosmeda, a nogutebem bakeamud, abele esorerapare.

³⁶ Simona, a abara boai, abi irmilare.

³⁷ Uiaba abi erdali, uiaba abi detager, kega, Ui uridili mari naraimeli.

³⁸ E uiabim detaut, kega, Minabakeuare gaire maiged, a kaka marau abele; abelelam kara dorge dali.

³⁹ E marau muige gaire uiaba sunago Galilaia uridili, a demoni giz imuda.

⁴⁰ Abim keitoabuki nerute lepera, a abim ermeder, abi detager, kega, Ese mama laglag, mama umele kari nadgiri.

⁴¹ E abi omare, a tag itrimuda, a abi ituti, a abi detager, kega, Kara lag; ma idigiri

42 E emetu detager abele mer, sobkak lepera dekaida abielam, E idigir.

43 E abi mer tigri, a abi emarida,

44 A abi detager, kega, mamor dasmer, atager kak nerute le; bakeamuda, mabu natomelu abi zogo tarim le, a ikuar gaire lu Mose mer tigri uiabim; atamelam mama emetu idigir.

45 E bakeamuda, a ditimeda ko daratagerare, a detager deraueili, abelelam Iesu nole umer kak paret kak ekas abele ged, E soqe purge emeri; gaire le abim tabakeuare abgedlam.

2

1 Gerger giz barki, E iako Kaperenauma uatabu; ui asereda E muige meta.

2 Sobkak gaire le netate gedim, meta mui osmeda, pako adige; E uiabim Ade ra mer marau.

3 Uiaba abim tabakeuare, nerute le ibibi egardare, neis a neis le abi bakeuarare.

4 Uiaba umer kak abi dog maiem bakeuare mitkarlam: uiaba meta tumge ezagarare E muige, a lemm ismi, uiaba sik dikri gim le tumge igimrare.

5 Iesu erdarda uiaba oituli, E le ibibi detager, kega, Kara uerem, emetu adem dikri mara uit giz.

6 Uader aotale giz abele emeri, a tababu dikiapor muige uiaba nerkep ge, kega,

7 Nalugelam le dali detager mokakalam? E Ade desauersili, nete le umele uit dikri, Ade tepteb?

8 Sobkak Iesu opasereret muige abara nerkep abele uiaba dikiapor muige uiaba nerkep, E

uiabim detager, kega, Nako uaba dikiapor mokakalam muige uaba nerkep?

⁹ Nako perper, le ibibi egali, kega, Emetu adem dikri mara uit giz; pako egali, kega, Tekue, mabara sik ekau, a bakeamu?

¹⁰ Ko uabim paret kak, Le la Uerem adigiri gaire uit geseb ge adem dikri, (E le ibibi detager, kega,)

¹¹ Kaka mari natager, kega, Tekue, mabara sik ekau, a mabara meta bakeamulu.

¹² E ekueda, a sobkak tabara sik ekaida, a E osmeda uiaba op uridili; abelelam uiaba uridili damedera, a Ade despili, kega, Meriba nole dasmerauem tonar mokakalam.

¹³ E iako keper dege degemili; gaire le abim tabakeuare, E uiabim ereuerem.

¹⁴ E uteb esaimelu, E Leui, Alefaio ra uerem, dasmer meta dipumeda emeri, E abi detager, kega, Kari narmili, E ekueilu a abi irmili.

¹⁵ Abele iobaru, E abara meta ge emeri leuer ero, telona giz a uit le giz kemem emeri Iesui dog, a abara kaimeg giz; abelelam gaire le uiaba abi irmilare.

¹⁶ Aotale giz a Faresaio giz abi dasmer kemem leuer ero telona giz a uit le giz, uiaba tabara kaimeg giz daratagerare, kega, Nako E kemem leuer ero a erele telona giz a uit le giz?

¹⁷ Iesu asoli abele mer, E uiabim daratagerare, kega, Saserim le giz lukup kemle lakak, gim le giz lagelag; kaka nole tabarki ko gaire barkak tonar dabgeri, debele gair uit le giz.

¹⁸ Ioane ra kaimeg giz, a gaire Faresaio ra kaimeg giz leuer baili; uiaba tabakeuare a abi

detager, kega, Nalugelam Ioane ra kaimeg giz a gaire Faresaio ra kaimeg giz leueru baili, a mara kaimeg giz nole leueru baili?

¹⁹ Iesu uiabi detager, kega, Nako, umele gaire boai le ispida ko leueru baili, le ispida uiabi dog emeri? uiaba umer kak leueru baili, le ispida mena uiabi dog.

²⁰ Kerker niai tabarki, le ispida uiabelam egared, abele gaire gerger uiaba leueru baili.

²¹ Nole le kerkar mog uali itkedi okakis buzibuzi am uali; akeulam buzibuzi mog uali de kerkar mog ualilam ekep itkedi, iako au atoata-toat.

²² Nole le epaiteret kerkar uaina muige emeret tarpor giz; epe gegur tarpor giz arperiklam, uaina epaiteredlu, epe sor giz adud: mamor ko kerkar gegur tarpor epaiteret kerkar uaina.

²³ Abele iobaru, E ekas kon gedub ge abele sabath; abara kaimeg giz kon itakemarare, a eroarare, gab ge.

²⁴ Faresaio giz abi detager, kega, Dasmer, nako uiaba lu akerare nole abkoreb sabath?

²⁵ E uiabi detager, kega, Nako uaba nole etagerare Dauida de ikeli, leuer aro kak, uerer eudili, a gaire abara kaimeg giz?

²⁶ E Ade zogo meta ge tabalu, Abiatara ra kerker, zogo tarim le, E derser areto eroli, abele nole abkoreb nogle tero, mamor zogozogo le tepteb, E abara kaimeg nakuarare?

²⁷ E uiabi detager, kega, Sabath emetu ikeli le la uai kedewa, a nole le ikeli sabath uaikedewa;

²⁸ Abelelam Le la Uerem sabath ra Opole.

3

¹ E iako sunago balu; abele nerute le tag euselu.

² Uiaba abi keikei dasmerare, nako, E abi idigiri sabath ge; uiaba ko abara mer atrumda.

³ E le tag euselu detager, kega, Eipu ekueda.

⁴ E uiabi detager, kega, Nako, abkoreb debe lu ikeli sabath ge, nako adud lu ikeli? ko idigiri, nako ipit eumid? Uiaba bazeguar.

⁵ E uiabi urkerem deraueli dasmerare, abara nerkep isir uiaba tonarlam bamesili, E le detager, kega, Mara tag uaimari. Abara tag uaimari; ueakai abara tag ekaida debele mokakalam nerute.

⁶ Faresaio giz teosmeda, a sobkak mer atagere, pako Herodiano giz, ko abi ipit eumida.

⁷ Iesu a abara kaimeg giz bakeauda abele keper ge; gaire le abi irmili Galilaialam, pako Iudaialam,

⁸ Pako Ierusalemalam, pako Idumealam, pako Ioridanolam sager op, pako uiaba maike Turo a Sidona, gaire le abim tabakeuare, abelelam uiaba asereda abara dorge ikeli.

⁹ E abara kaimeg giz mer tigri, ko kebi nar tais abi naokaili gaire lelam, uiaba abi atkaplam.

¹⁰ E gaire le nadgirare; abelelam ui uridili gim nagri abi atkap ueakai abi itutilu.

¹¹ Uite lamar giz abi dasmerare, uiaba abim bakesmeri, a ereretikri, kega, Mamanali Ade ra Uerem.

¹² E uiabim elele mer tigri, uiaba abi atomeret kak.

¹³ E paserem ogi, a dabgeri gaire le E laglag; uiaba abim tabakeuare.

14 E depeger tuelf le, ko abi kemem emri, a E uiabi namarkare ko marau.

15 Adgiri uiabi nakuarare ko nadgirare gaire gim le, a demoni giz imuda.

16 E Simona nei atker Peteru;

17 Pako Iakobo Zebedaiio ra uerem, a Ioane Iakobo ra keimer; E uiabi nei atker Boanerege, tonar, Girgir ra uerem:

18 Pako Anederea, a Filipino, a Batolomaio, a Mataio, a Toma, a Iakobo Alefaia ra uerem, a Tadaio, a Simona Kanana le,

19 Pako Iuda Isakariota, abi keser keser: uiaba metaem barot.

20 Ege gaire le netat gedim, abelelam uiaba umer kak leuer aroare.

21 Abara boai aserare, uiaba tabaos, ko abi terpei; uiaba detager, kega, E paim paim.

22 Aotale giz Ierusalemalam tabakeuare uiaba detager, kega, Bezebul abi dog, E demoni giz imuda opolelam demoni giz.

23 E uiabi darabgerare, a uiabi daratagerare gaire mer babisdarie, kega, Nako, Satana umele Satana imuda?

24 Ese nerute baselaia epuli, abele baselaia umer kak niaiem ekue.

25 Ese nerute uteb epuli, abele uteb umer kak niaiem ekue.

26 Ese Satana tababu barili, a epuli, E umer kak niaiem ekue, tabara mop tabarki.

27 Nerute le umer kak saserim le la meta ge badari, a abara lu itkamri, ese nole kekiam saserim le didbari; iako abara meta itkamri.

28 Ageakar kak uabi detagereda, kega, Gaire ezubameli, a gaire uit uerem le giz ko detue:

²⁹ Abele le Lamar Zogo ditagi, nole atue kak ni-
aiem, epe abkoreb abim ikuar niai bodomalam;

³⁰ Abelelam uiaba detager, kega, Uit lamar abi
dog.

³¹ Abara keimer pako apu abim tabakeuare; a
adige bako, uiaba namarida abi dabgeri.

³² Gaire le netate gedim abi derumeda bameri;
uiaba abi detagerare, kega, Ma dasmer, mara apu
a mara keimer giz adige, mari naraimeli.

³³ E uiabi detaut, kega, Nete kara apu a kara
keimer giz?

³⁴ E dasmerare uiaba abi derumeda bameri,
E detagereda, kega, Dasmer, kara apu a kara
keimer giz!

³⁵ Abelelam abele le Ade ra lag ikeli, E dali kara
keimer, a kara berbet, a kara apu.

4

¹ E iako degerati ko ereuerem keper tauer
ge, gaire le netate gedim abim, abelelam E nar
atiem, a emri, uiaba uridili tauer ge bamer.

² Gaire mer E uiabim ereuerem mer babis-
darie, E uiabidaratagerare abara okadeskeda,
kega,

³ Uaba aserauem; Dasmer, nerute amorda le
bakeam ko emor:

⁴ E dikri, a uader kep gab dege abi, epe ebur
giz kotorlam tabakeuda abele eroare.

⁵ Uader kep tumem neidge abi, kebi seb ge;
sobkak omeili, abelelam lerkar seb ge:

⁶ Gerger eupamada, a eueri, a eumili, abelelam
nole sip kak.

7 Uader kep lu eipu daradara ge omeili, a detarapi, abelelam nole turum kak.

8 Uader kep debe seb ge abi, a omeili, a esali, a turum turum; a turum therti nagri, a sikesti; a uan handed.

9 E uiabim detagereda, kega, Le grip nagri ko asoli, debele E asoli.

10 E tepteb emri, gaire le abi dog emri, pako tuelf le, abi itmer tonar abele mer babisdarie.

11 E uiabim detagereda, kega, Gaire mu tonar Ade ra baselaia uabi dekuarare ko opaserertem; emetu ikeli abele gaire lu abkoreb uiabim nogle giz:

12 Abelelam ui ko dasmerare, epe nole asmer kak; a asoli, epe nole asor kak; uiaba depegelam, a uiaba uit ko detue.

13 E uiabim detagereda, kega, Nako, uaba nole asmer kak abele mer babisdarie? epe nako uaba ko umele gaire mer babisdarie uridili?

14 Abele amorda le, emor Ade ra mer.

15 Abele uader le gab ge, abele mer uiabi dog emor; uiaba asereda, epe Satana tabarki, abele mer uiabi nerkep ge emor ekadari.

16 Abele uader tumem neid ge emor; uiaba abele mer asereda, a sobkak sererge erperida;

17 Epe nole sip kak muige uiaba nerkep ge, abelelam nole niai em ekue; menaba asi asi a dedkoli abele merlam tabarki, sobkak uiaba bakesmiri.

18 Abele uader le eipu daradara ge emor; uiaba abele mer asoli,

19 Epe gaire dikiapor lu lag geseb ge uiabi nerkep ge badari, pako geseb lu okardarem, pako

uader lu lag, abele mer etarapi, epe nole turum kak.

²⁰ Ege uader emor debe seb ge; uiaba abele mer asoli, a mamor erpeili, a turum turum, uader therti, a uader sikesti, a uader uan handed.

²¹ E uiabim detagereda, kega, Nako, lamepa ikedi kumete lokod ge, a laulau lokod ge? epe nole tum ge ikedi lamepa uteb?

²² Epe nole lu ispili, a nole opasereret kak; pako nole mud ge lu, a nole akmer kak.

²³ Ese nerute le grip nagri ko asoli, debele E asoli.

²⁴ E uiabim detagereda, kega, Uaba mamoro aserauem; abele tonar uaba detare, ko uabim detare; a ko uabi daisuerare le asereda.

²⁵ Le nagri, ko abi ikuar; le nole nagri kak, ko ekada abele lu abi dog.

²⁶ E detagereda, kega, Ade ra baselaia mokakalam le kep dikri seb ge;

²⁷ E ko uteid, a ekeamlu ki ge a gerger, abele kep uai omeida, a bataile, E nole umer kak nagelam.

²⁸ Tababu seb ge omeili; uai kekiam, sik keubu, epe turum agiag.

²⁹ Turum agiag, epe namarida ko tigri, kerker ge nurabi.

³⁰ E detagereda, kega, Na lu meriba ko abkoreb Ade ra baselaia? na lu abkoreb abele babisdarie?

³¹ Abele mokakalam sinapi kep, emetu emor, kebikebi kep tumem gaire kep uridili geseb ge emor,

³² Emetu emor, E omeida, a aule tumem gaire lu ekekri, epe gaire au tam disiri; a gaire ebur epereda mudi ge igiredi.

³³ E Ade ra mer uiabim detagereda, mokakalam gaire mer babisdarie, abkoreb uiaba umele asoli.

³⁴ E nole uiabim atager kak, ese nole mer babisdarie; uiaba mud uteb ge, E uiabim, abara kaimeg giz, gaire tonar mer detaut.

³⁵ Abele gerger kikem, E uiabim daratagereda, kega, Minaba atiem nerut apekem.

³⁶ Uiaba emetu le lakub emarida, uiaba abi egared nar ge atiem. Uader kebi nar abi doakri.

³⁷ Au ui tabarki, a gaire zauber nar etatkoi, a mitkar.

³⁸ E amaz ge kor ge uteidi: uiaba abi itir, a abi detager, kega, Kole, mama laglag ki nabaume?

³⁹ E tekue, uag daisumda, a gur detager, kega, Bamer, debe meda. Iako uag ekeamulu, ege metalu.

⁴⁰ E uiabim daratagereda, kega, Nalugelam uaba geum mokakalam? nako uaba nole oatur kak?

⁴¹ Uiaba au geumu, a mer atagere, kega, Nete dali, uag a gur abi asoli?

5

¹ Uiaba nerute apek tauer ge tabarki, abele Gadara le la ged.

² E narlam eupamada, epe sobkak nerute le uit lamar bada abim obapit: abele le gaire aolam tabakeam,

³ E gaire ao ge emri; nole le umele abi didbari, a malil par nolea:

⁴ Dordor abi didbari, teter ge a tage malil paru, abele tage a teter didbari, E dergeiri; nole le umer kak abi maiem ekepli.

⁵ Ki ge, a gerger ge, E mena emerilu abele gaire paser, a gaire ao ge, E ereretikri, a abara gem baker de esakeilu.

⁶ E muriz ge Iesui dasmer, E koreder abim a esorgiru.

⁷ E au kodo ereretikri, kega, Kaka nako marim, Iesu Ade ra Uerem, au kale? Kaka marim bali Ade ra op, nole kari asiasi nakeli.

⁸ Abelelam, E abi detager, kega, Ma lamar uit teosmeda lelam.

⁹ E abi itmer, kega, Mara nei nako? E detaut, kega, Kara nei legeona; abelelam keriba gaire.

¹⁰ E elele abim bali, kega, Nole keriba amu kak ab gedelam.

¹¹ Abele borom au isir gorgor paser ge erueda.

¹² Gaire demoni giz abi damseda, kega, Keribi demarida gaire boromem, ko keriba uiabim badari.

¹³ Iesu sobkak uiabi emarida. Abele uit lamar giz teosmeda, a gaire borom ge barti; epe borom isir uamen uamen koreder au gorgorlam keperem, (uiaba maike tu thausan;) iako gune obaiter.

¹⁴ Le giz borom naseserdare koreder ge, a gedim, pako gaire ged daratagerare. Uiaba tabakeuare, a dasmer abele tonar ikeli.

¹⁵ Uiaba Iesuim tabakeuare, uiaba abele le dasmer demoni legeona dedkoli emeri, a amear, a tonar tonar; epe uiaba geum.

¹⁶ Uiaba le erdali mer poipi detaut gaire tonar le demoni dedkoli, a tonar borom giz.

17 Uiaba ditimeda abi damosare, ko uiaba ged dekaer.

18 E nar atiem, le demoni dedkoli abi damos ko abi dog emeri.

19 E nole laglag, E abi detager, kega, Bakeam mabara ged, a mabara boai, a uiabi natomer-tauem abele gaire au lu Opole de marim ikeli, a mari omare.

20 E bakeamud, a ditimeda marau Dekapolem gaire au lu Iesu de abim ikeli; epe uiaba uridili damreda.

21 Iesu emetu iako atiem nerut apek, gaire le netate gedim abim; E meg tauer ge emeri.

22 Dasmer, nerute sunago kole tabarki, abara nei Iairo; E abi dasmer, E ekesmiri tabara teter ge,

23 A abim elele bali, kega, Kara kebi neur maike eumida; debele ma tabakeam a mabara tag abi tum ge dikmerik, ueakai abi idigiri, E ko eded akaida.

24 E abi kemem bakeam; a gaire le lakub abi irmili, uiaba abi ditkabda.

25 Abele nerut kosker mam gim tuelf gaire urut babusedari.

26 E au asias dimegeroa gaire lukup kemlelam, abara lu eseemuda, uiabi nakuarare lukup bodomalam, nole adigir kak, epe mena au gim.

27 E Iesu ra tonar asoli, E eipu gaire le ekasereder Iesu isorge, abara am uali ekepli.

28 Abelelam E detager, kega, Ese kaka abara am uali tepteb ekepli, kara gim akaida.

29 Sobkak abara mam diruruarti; E umele abara gem akaida abele gimlam.

³⁰ Sobkak Iesu abara nerkep ge opasereret nerute adigir osmeda abielam, E gaire le ge eipu egreemalu, a detager, kega, Nete kara am uali ge ekepeli?

³¹ Abara kaimeg giz detagereda, kega, Mama dasmer gaire le mari natkabda, nako tonar mama detager, kega, Nete kari dog ekepeli?

³² E op etarer ko kosker deraimerer abele lu ikeli.

³³ Kosker geum a durdur barki, abelelam E umele abele lu abi dog ikeli, E abara op ge ekesmer, a ageakar abi detager ueeseamur.

³⁴ E abi detager, kega, Kara neur, mabi oaturlam ma eded akaida; mapodan kem bakeamulu, ma eded akaida mabara gimplam.

³⁵ E mena detaut abele mer, sunago kole merkem tabarki, a abi detager, kega, Mara neur eumida; nako iako kole bamesili?

³⁶ Iesu asoli abele mer, E sunago kole detager, kega, Ma nole geum kak epe oituli.

³⁷ E uiabi daraisumdarda, nole le kak abi irmili, mamor Peteru, a Iakobo, a Ioane Iakobo ra keimer.

³⁸ Uiaba sunago kole ra meta tabakeuare; a uiabi saserimem nardarare, a ebazoli, ueu baudaredelare.

³⁹ E badari, a uiabi daratagereda, kega, Nako uaba saserim, a ebazoli? abele neur nole eud kak, E uteidi.

⁴⁰ Uiaba abi neg degarare. E emetu uiaba uridili adige namuare, E neur ra aba a apu tegared, a uiaba neis a neis le abi dog, a barot neur ra uteb.

⁴¹ E neur ra tag erpeilu, a abi detager, kega, Talitha kumi; tonar abele mer, Neur, kaka mari natager, Ekue.

⁴² Sobkak neur tekuelu, a bakeamulu; tuelf abara urut. Uiaba au kase damreda.

⁴³ E elele uiabi mer tigri, nole nerute le atomeret kak abele mer; epe E uiabi detager, kega, Debele leuer abi ikuar.

6

¹ E bakeam ab gedelam, a tabara ged ge tabarki; abara kaimeg giz abi irmili.

² Sabath ge, E ditimeda sunago ge ereuerem; gaire le asereda damreda, kega, Nagelam abele gaire dorge abi dog? nako pardali abi ikuar, ueakai gaire dorge adigir mokakalam abara tag ikeli?

³ Nako nole tonar le abele? nako nole Maria rauerem, Iakobo ra keimer, a Iose, a Iuda, a Simona? nako abara berbet nole meribi dog? uiaba abi derar.

⁴ Iesu uiabi daratagereda, kega, Nole perofeta ekekri, tepteb abara ged ge, a abara boai, a abara uteb ge.

⁵ E nole umer kak nerut adigir ikeli peike, abele dorge tepteb, abara tag gaire gim le dikmerik, a uiabi nadgirauem.

⁶ E au damreda uiabelam uatur kak. E bakeamuda deraueida abele gaire kebi uteb ge, a okadeskeda.

⁷ E tuelf le darabgerare, a ditimeda uiabi namarida neisi le a neisi le; a adigir uiabi nakuarare tumem gaire uite lamar;

⁸ E uiabi mer tigri, kega, Lu aisis kak abele bakeam, no koket tepteb; nolo epei kak, nole leuer kak, a nole mani kak muige uak;

⁹ A no teter gab amear; a nole neis am uali amear.

¹⁰ E uiabi daratagereda, kega, Uaba nerute meta ge badari, emri abele, a iako bakeauare.

¹¹ Uiaba le giz uabi agared kak, a nole uabi asor kak, uaba bakeam abele gedelam, sep ditkeda uaba teter gablam uiabi atamelam. Ageakar, kaka uabi detagereda, kega, Niaiem gerger it-mer, kebi bodamalam Sodomaem a Gomoraem tumem abele ged ge.

¹² Uiaba bakeauda, a marau, kega, Mamor uaba gaire le obazegeda.

¹³ Gaire uit lamar uiaba namuda, a gaire gim le uiaba ide epaitered, a uiabi nadgirare.

¹⁴ Heroda opole asoli, abelelam abara nei ekoseli; E detager, kega, Ioane Bapataiso eded akaida eudelam, abelelam E gaire adigir ikeli.

¹⁵ Uader detager, kega, Elia pedali. Uader detager, kega, Perofeta pedali, abelelam E nerute perofeta mokakalam.

¹⁶ Heroda asoli, E detager, kega, Ioane pedali, karielam abara kerem derapeida, E eded akaida eudelam.

¹⁷ Emetu Heroda namarkare Ioane terpeirare, a abi didbare muige au dubare meta ge Herodiam, Filipino ra kosker abara narbet: abelelam E abi ispilu.

¹⁸ Abelelam Ioane Heroda detager, kega, Nole marim abkoreb mara narbet ra kosker ispida.

19 Abelelam Herodia Ioane urker, a E lagelag abi ipit; a nole umer kak;

20 Abelelam Heroda Ioane geum, E opasereret Ioane barkak tonar, a zogo le, E abi asesereda. E abi asoli, a ikeli gaire dorge, a abi sererge asoli.

21 Gerger abkoreb tabarki, abele gerger Heroda eosmelu, E dersemer uiabim gaire opole giz, a gaire kole, a gaire tarim le Galilaia ge;

22 Herodia ra neur balu, a ginar diger, Heroda pako uiaba abi dog emri a sererge; opole neur detager, kega, Kari nautumer lu mara laglag, kaka mari nakuar.

23 E abi mer nakesmulu detager, kega, Kaka mari nakuar gaire lu mama kari nautumer, mokakalam kara baselaia mog.

24 E teosmeda, a abara apu detager, kega, Nalu kaka damos? Abara apu detager, kega, Ioane Bapataiso ra kerem.

25 Sobkak E iako opole badari, a abi detager, kega, Kaka laglag mama mena kari nakuar Ioane Bapataiso ra kerem abele tanelu ge.

26 Opole ra nerkep beber barki; epe E nole abi azer kak, abele mer akesmulam, a uiabelam abi dog bamer leuer eroare.

27 Opole sobkak memeg le namarida, a abi mer tigri, kega, Abara kerem tegaret.

28 E bakeamuda, a Ioane ra kerem derapeida muige au dubare meta ge, a abara kerem tegaret tanelu ge, a neur ikuar; a neur abara apu ikuar.

29 Ioane ra kaimeg giz aserare, ui bakeuare, a abara gem tegardare, a ao ge ikedarare.

³⁰ Iesu ra kaimeg giz tabakeuare abim; a abim daratagerare gaire dorge uiaba ikelare, a uiaba ereuerem.

³¹ E uiabi detagereda, kega, Mi nabakeuare le kak utebem, ueakai ner nabazier. Abelelam gaire le uatupili, a nole uteb ko leuer ero.

³² Uiaba nar ge gumik atiem abele le kak utebem.

³³ Gaire le lakub dasmer uiaba atiem, gaire le abi opaserertem, a koreder ge abim gaire gedelam uridili, uiaba kekiam tabarki, a netat gedim abim.

³⁴ E bakeam a gaire le dasmerauem, a uiabi nasge, abelelam uiaba mokakalam mamoe giz nole le asesered kak; a E uiabi ditimeda ereuerem gaire lu dordor.

³⁵ Kikem, abara kaimeg giz abim tabakeuare, a detager, kega, Soge pur ike, a kikem:

³⁶ Uiabi namarkare gaire gedim, a gaire utebem, leuer arapem uiaba aroem; abelelam uiaba nole leuer kak.

³⁷ E uiabi detagereda, kega, Uaba uiabi leuer nakuarare. Uiaba abi detager, kega, Nako, keriba bakeuare leuer arapem tu handed denari ko bodomalam, ko uiabi asisiem?

³⁸ E uiabi detagereda, kega, Naket areto uabi dog? bakeam dasmer. Uiaba edali, a detager, kega, Faif, a neis lar.

³⁹ E uiabi mer tigri ko nosik bameri tumem abele golegole soge ge.

⁴⁰ Uiaba nosik bameri, uader uan handed nosik, uader fifeti nosik.

⁴¹ E emetu faif areto tais, a neisi lar, E kotor dimiruarti, a esoao, a areto itur; a abara kaimeg

giz nakuarare uiaba opem idedi; E neisi lar ditker uiabim uridili.

⁴² Uiaba uridili leuer eroare, a kem osmeda.

⁴³ Uiaba leuer mog, a lar mog etakarare, epe tuelf epei osmeda.

⁴⁴ Mokakalam faif thausan gaire kimiar, areto eroare.

⁴⁵ E sobkak abara kaimeg giz elele daratirieda nar ge bartiri, ko atiem nerut apekem Bethesaida opem, abara dorge gaire le namarida.

⁴⁶ E emetu uiabi namarida, E paserem ogi esorerapare.

⁴⁷ Bakedilu abele kikem, nar eip karem ge, a Iesu tepteb geseb ge emrilu.

⁴⁸ E uiabi darasmerare uzalam sagim, abelelam uag opem uami; ki apek foa, E uiabim tabarki, zauber tum ge ekas; mokakalam E uiaba dege ekas.

⁴⁹ Uiaba abi erdali zauber tum ge ekas, uiaba dikiapor lamar pedali, epe uiaba au ereretikri;

⁵⁰ Abelelam ui uridili abi dasmer, epe uiaba geum. Sobkak E uiabi detagereda, kega, Saserimem; kai nali, nole geum kak.

⁵¹ E uiabim nar ge ekauererti; epe uag ekaida: uiaba abi au kase damereda.

⁵² Uiaba nole akiapor kak abele areto, abelelam uiaba nerkep kelarkelar.

⁵³ Uiaba emetu esaimeda atiem, uiaba tabarki Genesareta ged, a ged ge ekarida.

⁵⁴ Uiaba emetu ekarida narlam, sobkak uiabi abi opasereretem,

⁵⁵ A gedim kored deraueida, a ditimeda gim le giz bakuarda tumem sik, a kei tegardare abele uteb Iesu emri.

⁵⁶ Abele uteb, a ged, a gedub E tabarki, uiaba gaire gim le tegardare ugab ge ikedi, a abi damsare ko abara am uali dege ekpi; uiaba uridili abi ekpi nadgirauem.

7

¹ Faresaio giz, a uader aotale giz, netat gedim abim Ierusalemalam.

² Uiaba dasmer uader abara kaimeg giz areto er oare a ogog tag arub kak, uiaba mer mer.

³ Abelelam Faresaio giz, a Iudaia giz, nole leuer aro kak, ese nole mamoro tag ogarub kak, uiaba aule ra tonar irmirauem.

⁴ Uiaba tabarki leuer araplam, nole leuer aro kak, ese nole ogarup kak. A dordor tonar uiaba erpei, a ikerare, tanelu ogdirup, a tanelu tonar, a malil tanelu, a gaire sik.

⁵ Faresaio giz a aotale giz abi itmer, kega, Nako mara kaimeg giz nole irmili aule giz ra tonar, epe leuer arouem a tag ogarup kak?

⁶ E uiabi daratagereda, kega, Isaia mamoro uabim bes le giz perofetaem, emetu detali, kega, Abele ged ge kari naospereda uiaba mitelam, a uiaba nerkep kara muriz ge.

⁷ Uiaba sagim karim esorerapare, a gaire le la tonar ereuerem lelam.

⁸ Uaba Ade ra gelar dekaierta, a le la tonar elele erpei.

⁹ E uiabi daratagereda, kega, Uaba tonar Ade ra gelar dituaki, ueakai uaba tonar irmireda.

¹⁰ Mose detager, kega, Mabi abera, a mabi apuera naospili; E dali tabara aba a apu desauer-sili, debele abi ipit eumilu:

¹¹ Epe uaba detagerare, kega, Ese nerute le tabara aba, a apu detager, kega, Abele kara lu mari upinati Korabana, tonar abele, Emetu Adim ikuar;

¹² Uaba nole abi amari kak, ko nerut lu ikeli abem a apuem;

¹³ Abele uaba tonar lelam, Ade ra mer dedkoli; a gaire lu mokakalam uaba ikeli.

¹⁴ Ege E iako gaire le lakub derabgerare abim, E uiabi detagereda, kega, Uaba uridili kari asoli pako akmerem:

¹⁵ Nole sor lu le nerkep ge badari, umele abi dedkoli; mamoro gaire lu abi nerkeplam osmeda, abele gaire lu le dedkoli.

¹⁶ Ese nerute le grip nagri ko asoli, debele E asoli.

¹⁷ E metaem balu gaire le kublam, abara kaimeg giz abim eutumer tonar mer babisdarie.

¹⁸ E uiabim daratagereda, kega, Nako uaba ko nole umer kak? Nako uaba nole akmer kak, nole sor lu le kem ge badari, umele le dedkoli;

¹⁹ Abelelam nole abara kem ge badari, mamor teibur ge, a sumez ge imuda, a leuer uridili mamor ikeroa?

²⁰ Edetager, kega, Abele lu lelam osmeda, abele lu le dedkoli.

²¹ Abelelam mui le nerkeplam osmeda gaire adud dikiapor, a kogem, a eruam, a le ipit eumilu, a keserkeser,

²² A lu lag, a uit tonar, a okardar, a opelid, a erkepagau, a ezu bameli, a baospili, a paim tonar:

²³ Abele gaire adud tonar pedali mui nerkeplam eosmeda, a le dedkoli.

24 E tekue ab gedelam, a nener Turo a Sidona bakeamulu. E nerute meta badari, a nole lakak nerute le abi dasmer; epe E nole umer kak ispili.

25 Nerute kosker, abara neur nagri uit lamar, E asoli Iesu pedali, E tabakeam a Iesu ra teter ge asorgiru:

26 Abele kosker Heleni kosker, Surofoiniki osmeda. E Iesui damos ko demoni imuda abara neurlam.

27 Epe E abi detager, kega, Kekiam gaire uerem kem osmeda; nole abkoreb uerem ra leuer tais, a omai giz nakuarare.

28 Kosker abi detaut, kega, Ageakar, Opole; epe omai giz deroli laulau muige gaire leuer puiipi uerem giz aroem.

29 E koskerim detager, kega, Abele merlam, ma bakeam; demoni emetu bakeam marara neurlam.

30 Kosker tabara meta tabarki, E dasmer demoni nole akar, a abara neur uteidilu.

31 E iako bakeamulu Turo a Sidona nenerlam, a Galilaia keper tabarki, eipu Dekapoli.

32 Uiaba abim tegared nerut lo grip batapeli, a lukluk mer; uiaba abi damos ko tabara tag abi tum ge dikmerik.

33 E gumik abi tegared gaire lekublamlam, a abara neisi baur kei abara neis grip deraimilu, a mosu itu, a abara uerut itutilu;

34 A kotorem egremalu, a ner batauerdelu, a abi detager, kega, Efatha, tonar abele mer, Diski.

35 Sobkak abara neis grip darauskilu, a abara uerut kerar detue, a E barkak mer egali.

³⁶ E uiabim mer tigri, kega, Nole, nerute le atager kak: E sagim uiabim mer tigri, uiaba elele daratagerare abele lu.

³⁷ Uiaba au kase damereda, kega, E mamoro ikeroa gaire lu uridili: E gaire grip batapeli ikeli a asoli, a gaire te dabim, ko mer detaut.

8

¹ Abele gaire gerger, dordor le lakub, a uiaba nole leuer kak, E tabara kaimeg giz darabgerare, a uiabi detagereda, kega,

² Kaka le lakub nasenase, abelelam uiaba thri gerger kari dog emri, a nole leuer aro kak;

³ Ese kaka uiabi meta namarida, a nole leuer aro kak, uiaba gab ge durdur; abelelam uader muriz gedelam.

⁴ Abara kaimeg giz abi detagerare, kega, Nage-lam areto, abele soge purge, uiabi darasisieda?

⁵ E uiabim nautumereda, kega, Nako, naket areto uabi dog? Uiaba detagerare, kega, Sefen.

⁶ E le lakub mer tigri ko seb ge emereda; E gaire areto sefen tekadarare, a esoao, a itiri, a abara kaimeg giz nakuarare, uiaba opem ikedi; a uiaba le lakub opem ikedi.

⁷ Uader kebi lar uiabi dog: Iesu esoao, a uiabi detagereda ko ikedi.

⁸ Uiaba eroare, a kem osmeda: a uiaba leuer mogmog etaker, a gaire epei sefen arot.

⁹ Maike foa thausan, ui uridili leuer eroare; E uiabi namarida.

¹⁰ Sobkak E, pako abara kaimeg giz, nar ge ekauererti, a ged Dalmanutha atiem.

¹¹ Faresaio giz abim tabakeuare, a ditimeda abi basaret, ko abi mirem, abi itmer atamelam kotorlam.

¹² E au nerezi muige abara mar, kega, Nako abele nosik le atamelam deraimer? Ageakar, kak uabi detagereda, kega, Nole akuar kak atamelam abele nosik le.

¹³ E uiabi dekaer, iako nar ge ekauererti, a nerut apek atiem.

¹⁴ Uiaba okataprik ko leuer ais; no netat areto uiabi dog nar ge.

¹⁵ E uiabi mer tigri, kega, Beber dasmer, abele Faresaio ra leuen, a Heroda ra leuen mamoro dasmer.

¹⁶ Uiaba mer atagere, kega, Abelelam meriba nole areto kak.

¹⁷ Epe Iesu opasereret, E uiabi detager, kega, Nako uaba mer atager abele nole leuer kak? Nako uaba nole umer kak, uaba nole akiapor kak? nako uaba tumtum nerkep?

¹⁸ Nako uaba pone nagri, a nole asmer kak? a grip nagri, a nole asor kak? a nole akiapor kak?

¹⁹ Ababurge kaka faif areto itiri uiabim faif thausan, naket epei osmeda uaba etaker abele leuer mog? Uiaba abi detager, kega, Tuelf.

²⁰ A gaire areto sefen uiabi foa thausan, naket epei osmeda uaba etaker abele leuer mog? Uiaba abi detager, kega, Sefen.

²¹ E uiabi daratagereda, kega, Nako uaba nole akiapor kak?

²² Uiaba Bethesaida tabakeuare. Uiaba nerute le asamasam abim tegaret, a abi damos ko abi itut.

²³ E tage asamasam le erpei, a abi dadki-mortare abgedelam; E emetu abara neis pone mos ermeda, a tage abi tumge ikedi, E abi itmer, kega, Nako ma nole nerute lu dasmer?

²⁴ E kotor dasmer, a detager, kega, Kaka gaire le dasmer, mokakalam dordor lu nakasir.

²⁵ E iako tabara tage ikedi tumem abara neis pone; a E lidem dasmer, E ueakai debele, a gaire lu mamoro dasmer.

²⁶ E abi namarida abara metaem, a detager, kega, Nole bakeamu utebem abele.

²⁷ Iesu pako, abara kaimeg giz, gaire utebem Kaisaria Filipo bakeuare; eipu gab ge, Iesu abara kaimeg giz eutumer, kega, Nako gaire le natagere, kaka nete?

²⁸ Uiaba detaut, kega, Ioane Bapataiso; epe uader detager, Elia; a uader detager, Nerute perofeta giz.

²⁹ E uiabi daratagereda, kega, Nako uaba detager, kaka nete? Peteru abi detaut, kega, Mama Keriso.

³⁰ E uiabi mer tigri, nole nerut le abi atager kak abele.

³¹ E ditimeda uiabi ereuerem, Le la Uerem ko asiasi, a aule giz abi derar, a gaire tarim le, a zogozogo le giz, a aotale giz, ko abi ipit eumilu, a keubu thri gerger E iako eded akaida.

³² E paret kak detager abele mer. Ege Peteru abi datkimalu, a ditimeda abi daisumda.

³³ Ege E egremalu, a abara kaimeg giz dasmer-auem, E Peteru daisumda, kega, Mama Satana, bakeam kara sorge; ma nole akiapor kak Ade ra lu, mamoro le la lu.

³⁴ E emetu le lakub, kemem abara kaimég giz, darabgereda, E uiabi detagereda, kega, Nerute le laglag kari narmili, mamoro E tababu obogai, a abara satauro bakuar, a kari narmili.

³⁵ Abelelam ese nerute le laglag abara eded asisiem abele ko abi; epe ese nerute le abara eded abi, karielam pako Euangelia, abele ko ededem.

³⁶ Abelelam ese nerute le geseb ge uridili terapei, a abara eded abi, nalu bodomalam abim?

³⁷ Nade lu le ikuar abara eded bodomalam?

³⁸ Abelelam ese nerute le kari sirip ge, pako kara mer, eipu abele nosik adud le pako eruam le, abkoreb Le la Uerem ko abi sirip ge, E tabarki kemem gaire angela zogo, abara Aba zorom ge.

9

¹ E uiabi daratagereda, kega, Ageakar, kaka uabi detagereda, kega, Uader gaire le ge tekue, nole eud kak, kekiam uiaba Ade ra baselaia dasmerauem tabarki kemem adgiri.

² Eseamuda abele gaire gerger sikes, Iesu Peteru tegadare, a Iakobo, a Ioane, a uiabi taraisare tumem perepere paser, uiaba tepteb: abara gem uiabi opem depegemelu.

³ Abara am uali zoromzorom, kakekake mokakalam kiona ise; le ogarup umer kak ko kakekake mokakalam.

⁴ Elia a Mose uiabim paret kak; a uiaba mer atager Iesuim.

⁵ Peteru Iesui detager, kega, Opole ae, debele meriba emri ike, keriba thri nole niai meta

akerare; mara nerute, Mose ra nerute, a Elia ra nerute ko.

⁶ E nole akiapor kak abele mer E detager; abelelam uiaba au geum.

⁷ Uiaba natkamda baz de; abele kodo mer teosmeda bazelam, kega, Kara Uerem nasge idali: uaba mamor abim asoli.

⁸ Sobkak uiaba bager, a nole le asmer kak, epe Iesu tepteb uiabi dog.

⁹ Uiaba paserlam tabatueli, Iesu uiabi mer tigri, uiaba nole atomeret kak abele lu uiaba emetu dasmerare, pe kekiam Le la Uerem eded akaida eudelam.

¹⁰ Uiaba abele mer mamor asesered, a uiaba mer atager tonar abele eded akaida eudelam.

¹¹ Uiaba abi eutumer, kega, Nako, aotale giz detagereda, kega, Elia ko kekiam tabarki?

¹² E uiabi detagereda, kega, Ageakar, Elia ko kekiam tabakeam, gaire lu ko barditug; mokakalam emetu detali Le la Ueremlam, E ko au asiassi, a abi desauersili.

¹³ Kaka uabi detagereda, kega, Elia emetu tabarki, uiaba emetu abim ikeli uiaba lag, mokakalam emetu detali abielam.

¹⁴ Uiaba abara kaimeg giz tabarki, uiaba dasmer gaire le lakub uiabi dog deraueili, a aotale giz uiabim mer atager.

¹⁵ Uiaba uridili abi dasmerare, sobkak uiaba damreda, a abim koreder kega, Maiem.

¹⁶ E aotale giz itmer, kega, Nako uaba uiabi mer atager?

¹⁷ Nerute le kublam detaut, kega, Tarim le ae, kaka marim tegardelu kara uerem, nagri lamar te dabim dabim;

¹⁸ E abi erpei, a E darbor: E serur ge, a tereg ikupmaretili, a gem kerar: kaka emetu mara kaimeg giz detager, ko abi imuda; epe uiaba umer kak.

¹⁹ E uiabi detaut, kega, Uaba nosik oatur kak, nade mop kaka uabi dog emerili? nade mop kaka uabi mabus? E karim tegaret.

²⁰ Ui abim tegaret Iesuim; E abi dasmer, sobkak uit lamar abi darbor; a E sebge ekesmeri, a epeteli, a serur ge.

²¹ Iesu abara aba itmer, kega, Na kerker abele lu abim tabarki? E detaut, kega, Ditimeda kebi uerem.

²² Gaire kerker E abi ur ge batauered, a ko ni batauered, ueakai abi ipit eumilu: ese mama umele, ma keribi upinati, a keribi omare.

²³ Iesu abi detager, kega, Ese mama umele! Gaire lu eseamuda umele abi abele le oituli

²⁴ Sobkak abele uerem ra aba ereretikri, a ezoli detagereda, kega, Opole, kaka oituli, kara kebi oituli upinati.

²⁵ Iesu gaire le lakub dasmer netat gedim koreder, E uit lamar daisumda, a abi detager, kega, Mama lamar te dabimdabim a grip batapili, kaka marim mer tigri, abielam toesmeda, a nole abi nerkep ge iako barot.

²⁶ E ereretikri, a abi darbor, a tosemeda; abele uerem mokakalam le eud; iueakai gaire le batagereda, kega, E dali eumida.

²⁷ Iesu abara tag datkimoartare, a abi tekuelu; E tababu tekue.

²⁸ Iesu meta ge barot, abara kaimeg giz gumik abim eutumer, kega, Nalugem keriba umer kak abim imuare?

29 E uiabi daratagereda, kega, Abele lu mokakalam nole tabarki, mamoro esorerapare, a leuer baili tepteb.

30 Uiaba ab gedelam teosmeda, a eipu Galilaia nakaseredi; E nole lakak nerute le abi dasmer.

31 Iesu abara kaimeg giz ereuerem, a uiabi detagereda, kega, Le la Uerem ko emarida uiabim gaire le la tag, uiaba ko abi ipit eumilu; uiaba emetu abi ipit eumilu, E iako eded akaida keubu gerger thri.

32 Epe uiaba nole akmer kak abele mer, ui geum ko abim eutumer.

33 Uiaba Kaperanauma tabarki; E muige meta, E uiabim eutumer, kega, Nalu uaba gab ge basareda?

34 Uiaba baziguar: abelelam uiaba gab ge basared, nete aule.

35 Iesu emri, a tuelf le dabgeri, a uiabi detagereda, kega, Ese nerute le laglag ko kekiam, E uiaba uridili sorge ekasered, a E uiabim uridili memeg le.

36 E nerute kebi uerem egaret, a abim ekueilu uiaba opem: a tag ge erpei, E uiabi detagereda, kega,

37 Abele le nerute uerem mokakalam egaret, muige kara nei, E kari nagaret: a abele le kari nagaret, E nole kari nagaret tepteb, mamoro E dali kari namarida.

38 Ioane abi detaut, kega, Kole ae, keriba nerute le erdali demoni giz imuda mara nei de: E nole meribi armili kak, ki emetu abi daisumda, abelelam E nole meribi irmili.

³⁹ Epe Iesu detager, kega, Nole abi asiumdar kak; nole nerute le adigir ikeli, muige kara nei, ko sobkak kari nasauersili.

⁴⁰ Abele le nole meribi dedkoli, E meribi kemem.

⁴¹ Abele le ni sor uabi ikuar, abelelam uaba Keriso ra boai, ageakar, kaka uabi detagereda, nole ab kak bodomalam abim.

⁴² Ese nerute le dedkoli nerute kebile kari oit-uli, debele abim idid baker abara pereg didbare, a E gurim batimed.

⁴³ Ese mara tag mari nadkoli, ismi adem; debele ma ededem barot netate tag, a adud neis tag gena barot, abele ur asam kak:

⁴⁴ Abele nole eud kak uiaba gegedar, a ur asam kak niaiem.

⁴⁵ Ese mara teter mari nadkoli, ismi adem; debele ma ededem barot netate teter a adud neis teter genaim batauered, abele ur asam kak niaiem:

⁴⁶ Abele nole eud kak uiaba gegedar, a ur asam kak niaiem.

⁴⁷ Ese mara pone mari nadkoli, dikiamur; debele ma Ade ra baselaia barot a netate pone, adud neis pone gena ra ur batauered:

⁴⁸ Abele nole eud kak uiaba gegedar, a ur asam kak niaiem.

⁴⁹ Gaire le uridili ko sol ur de.

⁵⁰ Sol debe lu: ese nole kurabkurab, nako uaba iako kurabem? Uaba sol mamoro nagri muige uabi nerkep ge, uaba ko demeger nerute a nerute.

10

¹ E ab gedelam tekue, a bakeam Iudaia nener ge abele Ioridano apek; iako gaire le netat gedim abim; E uiabi ereuerem, mokakalam abara tonar.

² Faresaio giz tabakeuare, a uiaba abi eutumer, kega, Nako, gelar nagri nerute le abara kosker dituaki? Uiabi abi mirem.

³ Ege E uiabi detaut kega, Nako Mose uabi mer tigri?

⁴ Uiaba detager, kega, Mose de emarida ko jauali detali, epe kosker dituaki.

⁵ Iesu uiabi detaut, kega, E detali abele gelar abelelam uaba nerkep kelarkelar.

⁶ Emeret ditimeda gaire lu detagem, Ade uiaba detagem kimiar, a kosker.

⁷ Abelelam, kimiar abara aba a apu dekaerti, a abara kosker ekpi;

⁸ Uiaba neis le netat gem; iako nole neis gem, epe netat gem.

⁹ Abelelam, Ade de daratkaprida, nole le atakeamur kak.

¹⁰ Muige meta, abara kaimeg giz iako abi eutumer tonar abele mer.

¹¹ E uiabi detagereda, kega, Ese kimiar abara kosker dituaki, a ko nerute tegared, E abi kogem:

¹² Ese kosker abara kimiar dituaki, iako nerute tegared, E kogem.

¹³ Uiaba gaire kebile abim tegardare, ueakai E uiabi itut; abara kaimeg giz uiaba gaire le tegardare daisumdarare.

¹⁴ Iesu dasmer, abara nerkep asiassi, E uiabim detagereda, kega, Kebi omasker karim tara-markare, nole uiabi aisumdar kak; abelelam, Ade ra baselaia uiabi koreb.

¹⁵ Ageakar, kaka uabi detagereda, kega, Ese nerute le Ade ra baselaia nole erpei kak mokakalam kebile, E nole abele ge badare.

¹⁶ E uiabi egared, a abara tag uiabi tumge ikedi, a debe mer uiabim.

¹⁷ Iesu gab ge ekasered, nerute le kei koreder temerida, a abim kokomam, a abim eutumer, kega, Debe Kole ae, nalu kara dorge ikeli ueakai kaka nagri eded aseamur kak?

¹⁸ Iesu abi detager, kega, Nako ma nagali kaka debele? nole nerute debele, epe Ade tepteb.

¹⁹ Mama gelar giz umele, kega, Ma nole ipit eumilu; Ma nole ko kak; Ma nole eruam kak; Ma nole bes mer nerute le ataut kak; Ma nole nerute le okardar kak; Ma mamoro mara aba a apu naospereie.

²⁰ E Iesuim detuat, kega, Kole, kaka emetu irmili abele gaire lu kebi ueremlam.

²¹ Iesu abi dasmer, a abi omare, a abi detager, kega, Netate lu ma nolea; bakeamu, a mabara lu terapei, a gaire le lu kak nakuarare, iako mara lu nagri kotor ge; a tabakeam satauro ekadar, a kari narmili.

²² Abara nerkep beber abele merlam, a E ezoli bakeamuda; abelelam E lu giz ra apu.

²³ Iesu dasmer deraueili, a abara kaimeg giz detagereda, kega, Au sagim lu giz ra apu ko barot Ade ra baselaia!

²⁴ Abara kaimeg giz au geum abele abara merlam. Iesu iako uiabi detagereda, kega, Kara

omasker, au sagim gaire le lu lag Ade ra baselaia barot!

²⁵ Kamela norgor ko badari atketelu nebge, a le lu giz ra apu etkoprida Ade ra baselaia bardari.

²⁶ Uiaba au geum, a mer atager, kega, Nete le umele ko eded?

²⁷ Iesu uiabi dasmer, a detagereda, kega, Le nole umer kak abele, Ade umele, E umele gaire lu uridili.

²⁸ Peteru ditimeda ko abi detager, kega, Dasmer, keriba emetu dekaer keriba lu uridili, a mari narmili.

²⁹ Iesu detaut, kega, Ageakar kaka uabi detagereda, kega, Ese nerute le meta dekaer, a keimer giz, a berbet giz, a aba, a apu, a abara kosker, a uerem giz, a ged giz, karielam, a euangelia,

³⁰ Peirdi abele gerger, E iako egared uan handed meta, a keimer giz, a berbet giz, a apu giz, a uerem giz, a dordor ged, asiassi kemem; kerker ge niaiem eded aseamur kak ko egared.

³¹ A gaire le kekiam ko keubu; a gaire keubu ko kekiam.

³² Uiaba Ierusalemam gab ge ekasered; Iesu kekiam bakeam: uiaba damreda; a abi irmili geum. E iako gaire tuelf le tegared, a ditimeda ko uiabi detagereda abele gaire lu abim ko tabarki, kega,

³³ Dasmer, mi Ierusalemam nogi; uiaba Le la Uerem emarik uiabim tarim giz, gaire zozozogo le, pako aotale giz; uiaba ko abim mer akesmur ko eumida, a uiabim gaire nogle nakuarare:

³⁴ Uiaba ko abi neg degarare, a abi damerik, a abi mos akeida, a abi ipit eumida; abele gerger thri, E iako eded akaida.

³⁵ Iakobo a Ioane, Zebedaio ra uerem giz, Iesuim tabarki, a detager, kega, Kole ae, ki laglag mama keribim ikeli abele lu ki laglag.

³⁶ E uiabi detagereda, kega, Nalu lu ua laglag kaka uabim ikeli?

³⁷ Uiaba abi detagereda, kega, Keribi dekuar ko keribi emri, nerute tuter pek, a nerute ber pek, mara zorom ge.

³⁸ Iesu uiabi detagereda, kega, Uaba nole umer kak abele lu uaba damseda. Nako, uaba umele ko tanelu erehi kaka ko are? a bapataiso egared kari bapataiso?

³⁹ Uiaba abi detagereda, kega, Ki umele. Iesu uiabi detagereda, kega, Uaba ko tanelu erehi kaka ko are; a bapataiso egared kari bapataiso:

⁴⁰ Epe ko emri kara tuter pek, a kara ber pek, nole kara dorge nakuar; mamoro uiabim emetu derser.

⁴¹ Ten le asoli, uiaba ditimeda Iakobo a Ioane urker.

⁴² Epe Iesu uiabi dabgerare, a uiabi detagereda, kega, Uaba umele uiaba tonar dikiapor sirdam gaire nogle, a uiaba kabdigili; a gaire aule uiabi sirdam.

⁴³ Nole mokakalam uabi dog: ese nerute le uabi dog laglag ko aule, debele E uaba memeg le:

⁴⁴ Ese nerute le uabi dog laglag kekiam, E memeg le uabim uridili.

⁴⁵ Mokakalam Le la Uerem nole tabarki memeg le taraisare, mamoro E uiabim memeg le, a abara

eded nakuar ko eded bodomalam uiabim gaire le giz.

⁴⁶ Uiaba Ieriko tabarki: Iesu a abara kaimeg giz kemem gaire le lakub osmeda Ierikolam, nerute le pone sademer gab deg emri, E lu damos, abara nei Baratimaio, Timaio ra uerem.

⁴⁷ E asoli abele Iesu Nazaretalam, E ditimeda ereretikri, kega, Iesu Dauida ra uerem, kari omare.

⁴⁸ Dordor le abi daisumdarare ko baimilu: E elele ereretikri, kega, Dauida ra uerem, kari omare.

⁴⁹ Iesu tekue, a detager, kega, Abi dabgeri. Uiaba sademer le dabgeri, a abi detager, kega, Saserimem: tekue, E mari dabgeri.

⁵⁰ E abara am uali adem, a tekue, a Iesuim bakeam.

⁵¹ Iesu abi detaut, kega, Nalu ma laglag kaka marim ikeli? Sademer le abi detager, kega, Raboni ae, kara pone iako bakaerti.

⁵² Iesu abi detager, kega, Bakeam, ma eded mabi oatulam. E sobkak pone bakaerti, a Iesu irmili abele gab ge.

11

¹ Uiaba maike Ierusalem, a Bethefage, a Bethania, abele paser ge Oliua, Iesu namarida neisi abara kaimeg giz, a uiabim detager, kega,

² Ua bakeamlam abele ged uaba opem: ua abele tabarki, ua ko dasmeram asina ra uerem didbarda, abi sor agimur kak; abi detue, karim tegared.

³ Ese nerute le uabi detager, kega, Nalu uaua ikeli abele? ua detautam, Opole abi laglag: E sobkak abi emarida.

⁴ Ui bakeamulei, a asina ra uerem erdali abele mai gab ge esakri didbare; ui abi detue.

⁵ Uader le abele ekue, ui detager, kega, Nalugem ua asina ra uerem detue?

⁶ Ui ge uiabi detagereda mokakalam Iesu mer tigr: epe uiaba ui namariklam.

⁷ Uiaba asina ra uerem Iesuim egardale, a uiaba dordor am uali abi sorge dikmerikare; a E abi sorge egimulu.

⁸ Gaire le lakub uiaba dordor am uali gab ge esegarare: uader lu tam ismi, a gab ge esegarare.

⁹ Uiaba kekiam le, a uiaba armi le, ereretikri, kega, Hosana; Uerkab abele le Opole ra nei tabarki:

¹⁰ Uerkab Dauida ra baselaia, meriba aba, tabarki Opole ra nei: Hosana gaire lu tum ge.

¹¹ Iesu Ierusalem tabarki, a zogo meta ge badari; E deraueilu dasmer gaire lu uridili; kikem E Bethania nakaseredi, kemem gaire tuelf le.

¹² Iuaokaer, uiaba tabakeuare Bethanialam, E uerer ge.

¹³ E suke erdalu muriz ge lam nagri, E bakeam dasmer, ese turum nagri: E abele tabarki, E no lam dasmer; nole tabarki kerker turum.

¹⁴ Ege E suke detager, kega, Nole le mara turum aro kak niai karem. Abara kaimeg giz asereda.

¹⁵ Uiaba Ierusalem ge tabarki; Iesu zogo meta ge badari, a ditimeda uiabi daratirieda gaire le

lu terapeirare zogo meta muige, a bau lu terapeirare eraskida, a uiaba dibadib terapeirare, uiaba gaire sik eraskida;

¹⁶ Pako E nole nerute le amari kak tanelu tais zogo meta ge.

¹⁷ Iesu uiabi ereuerem, kega, Nako, nole autar kak, Ko kara meta nei atker, kega, Esorerapare meta uiabim gaire le uridili? epe uaba emetu depegereda abele mokakalam baker kur ge uiabim gaire eruam le giz.

¹⁸ Aotale giz asereda, a zogozogo le giz, uiaba deraimer ko abi ipit: uiaba abi geum, abelelam gaire le lakub abara ereuer damededa.

¹⁹ Gaire kikem, E osmeda ab gedelam.

²⁰ Idim ge, uiaba gab ge ekasered maike abele suke, ui dasmer abele suke ekeamulu giz ge ditimeda.

²¹ Peteru dikiapor, epe abim detager, kega, Rabi, dasmer, abele suke mama desauersili, abele ekeamulu.

²² Iesu uiabim detaut, kega, Ua ko Adim oituli.

²³ Ageakar, kaka uabi detagereda, kega, Ese nerute le abele paser ge mer detager, kega, Ma eupumar, a gur ge baraigida; a nole abara nerkep emarili, E ko egared abele mer E detager, oitulilam.

²⁴ Abelelam, kaka uabi detagereda, kega, Gaire lu uridili uaba damos esorerapare ge, oituli uaba ko nagri, epe uaba ko nagri.

²⁵ Ua taba ko esorerapare, ese nerute le uabi dedkoeda, abi emariklu; iako uaba Aba kotor ge uaba uit emarik.

²⁶ Ese uaba nole emarik, iako uaba Aba, kotor ge, nole uabi uit giz emarik.

27 Uiaba iako Ierusalemata takomeda: E muige zogo meta ekasereeder, epe zogozogo le giz abim tabakeuare, a aotale giz, a au le giz;

28 A abi detager, kega, Nalu abele sirdam mama ikeli abele gaire lu? a nete le marim ikuar abele sirdam ko mama ikeli abele gaire lu?

29 Iesu uiabi detager, kega, Kai uabim eutumer nerute mer, ese ua kari natautare, kaka ko uabi detagerare abele sirdam kaka ikeli abele gaire lu.

30 Ioane ra bapataiso, nako kotorlam, nako lelam? kari nataut.

31 Ege uiaba mer atagere, kega, Ese meriba detagerare, kega, Kotorlam; ege E detager, kega, Nalugelam uaba nole abi agared kak?

32 Ese meriba detagerare, kega, Lelam: uiaba geum gaire lelam, abelelam gaire le uridili Ioane egared mokakalam perofeta kar.

33 Ege uiaba Iesuim detaut, kega, Keriba umer kak. Iesu uiabim detager, kega, Kaka nole uabi atager kak abele sirdam gaire lu kaka ikeli.

12

1 Iesu ko ditimeda uiabim detager gaire mer babisdarie, kega, Nerute le uina gedub akerare, a kar derumeda, a uak dakeili ko uina igmesi, a eskare emoarare, a gedub le nakuarare, a muriz ged bakeamuda.

2 Nurge, E nerute memeg le mamarida uiabim gaire gedub le, ko uina turum taisare uiabelam.

3 Uiaba abi terpei, a abi damarik, a abi dituaki, nole lu kak.

⁴ E iako uiabim nerute memeg le namarida; a ui bakiru abi erborare, abara kerem nakesmuare a emetu dedkoare, uiaba abi dituaki.

⁵ E iako nerute namarida; a uiaba abi ipit eumida: a ko uader gaire; a uader damarik, a uader ipit eumida.

⁶ E nagri netat uerem nasge: E keubu abi namarida uiabim, kega, Uiaba ko kara uerem geum ge.

⁷ Uiaba gaire gedub le mer atagere, kega, Ab kesem peik; tabakeuare, meriba abi ipit, a gaire abara lu, meriba lu.

⁸ Ege uiaba abi terpei, a ipit eumida, a adige batauerem uina gedublam.

⁹ Uina gedub ra opole nalu ko ikeli? E ko tabarki a uiabi gedub le atkirua, a uina gedub uader le nakuarare.

¹⁰ Nako uaba nole jauali zogo atager kak, kega, Abele baker uiaba gaire le meta emorare dituaki, emetu ikeli abele meta serer ge:

¹¹ Abele lu Opole de ikeli, meriba dasmerare, a damareda?

¹² Uiaba deraimeri ko abi terpei, epe uiaba gaire le lakub geum ge; abelelam uiaba umele abele mer babisdarie E uiabi detager: uiaba abi dikaerti, a bakeamuda.

¹³ Uiaba uader Faresaio giz Iesuim namarida, a Herodiano giz, ko abara mer asesered.

¹⁴ Uiaba tabarki, a abi detager, kega, Kole, keriba umele mama le ageakar, a nole le geum kak; ma nole akiapor kak le la op, mamoro Ade ra gab ageakar ereuerem: Nako, barkak Kaisaraim lu nakuar, a nolea?

15 Nako, keriba ko ikuar, a keriba nole akuar kak? Epe E opasereret uiaba okardare, a uiabim detager, kega, Nalugelam uaba kari mirem? denari kari nakuar, kaka dasmer.

16 Uiaba nerute tais, E uiabi detager, kega, Abele nete ra op, a aotale? Uiaba abi detager, kega, Kaisara.

17 Iesu uiabim detaut, kega, Kaisara ra lu Kaisaraim nakuar, a Ade ra lu Adim nakuar. Uiaba abi damreda.

18 Sadukaio giz abim tabakeuare, uiaba dikia-por nole eded akaida; uiaba abi nautumer, kega,

19 Ereuer le ae, Mose keribi detali, kega, Ese nerute le la keimer eumida, a abara kosker dikaerti, a nole uerem kak, abara keimer abele kosker egared, ko abi keimer kesem.

20 Sefen keimer giz: abele narbet kekiam ko ispida epe eumida, nole kesem kak;

21 Nerute keimer kosker egared, epe eumida nole kesem kak; mokakalam nerute keimer:

22 Sefen keimer giz nole kesem kak. Keubu kosker eumida.

23 Niaiem, uiaba tekue abele eded akaida, nete ra kosker uiaba? Abelelam emetu gaire sefen le abi egared uiaba kosker.

24 Iesu uiabim detaut, kega, Abele giz uaba didmirik, nako uaba nole umer kak jauali zogo, a Ade ra adigir?

25 Ese uiaba eded akaida eudelam, kosker agared kak, a akuar kak; uiaba ko abkoreb gaire angela kotor ge.

26 Abele eud le giz, ko eded akaida; nako uaba nole Mose ra jauali atager kak, Ade abi detager

lulam, kega, Kaka Abarahama ra Ade a Isaaka ra Ade, a Iakobo ra Ade?

²⁷ E nole Ade kak eud le giz, mamor Ade gaire eded: abelelam uaba au didmirik.

²⁸ Nerute aotale giz kei tabakeam, E uiaba mer atager asoli, a opasereret Iesu de uiabim barkak detaut, E abi eutumer, kega, Nade aule gaire gelar uridili?

²⁹ Iesu abi detaut, kega, Abele aule gelar giz uridili, kega, Isaraela ma asoli Iehoua meriba Ade, Iehoua tepteb:

³⁰ Ma ko Iehoua laglag mara Ade, a mara nerkep netat, a mara mar netat, a mara saserim kemer kemer.

³¹ Mokakalam abele gelar neisiem, kega, Ma ko omare le mari dog emeri mabi koreb. Nole nerut au gelar tumem abele neisi gelar.

³² Aotale abi detager, kega, Uao Kole, ageakar mama detager; Ade netat; E tepteb:

³³ Le abi laglag abara nerkep netat, a abara pereg netat, a abara mar netat, a abara saserim uridili, a omare le abi dog emeri abi koreb, abele lu kar tumem gaire lu nakuar uridili.

³⁴ Iesu dasmer E barkak detaut, E abi detager, kega, Ma nole muriz kak Ade ra baselaia. Nole nerute le saserim ko abi eutumer.

³⁵ Iesu muige zogo meta ereuerem, a detager, kega, Nalugelam aotale giz detagereda, kega, Keriso Dauida ra uerem?

³⁶ Dauida detager Lamar Zogolam, kega, Iehoua kari Opole detager, kega, Ma emri kara tuter tag pek, pako kaka eseamuda mara keubu le giz ikedi ko mara teter mas.

³⁷ Daida abara nei atker Opole; nalugelam E abara uerem? Le lakub abi sererge asoli.

³⁸ Iesu uiabim daratagered muige abara ereuerem, kega, Aotale giz dasmer, uiaba laglag nakasir perepere am uali, a laglag gaire le uetpur uteb ge uiabim naospereda,

³⁹ A uiaba laglag gaire op sik muige sunago giz, a gaire op sik uetpur ge:

⁴⁰ Uiaba itkamer gaire lu muige meta mai kosker giz ra meta, a perepere esorerapare abele itkamare; uiaba ko nagri au uit bodomalam ko.

⁴¹ Iesu mani epei op emeri, a dasmer uiaba tonar epei ge mani batauereda: gaire lu giz ra apu aule batauereda.

⁴² Nerute mai kosker tabakeam, nole lu kak, a neis kebi mani natimeda, mokakalam netate fathen.

⁴³ Iesu abara kaimeg giz darabgerare, a uiabim daratagereda, kega, Ageakar, kaka uabi detager, kega, Abele mai kosker, nole lu kak, abele batauereda mani epei ge uiabi uridili tumem batauereda:

⁴⁴ Abelelam uiaba uridili batauereda uiaba au lu giz ra apulam; E natimeda uridili nole lu kaklam, abele abara leuer terapei.

13

¹ Ege E teosmeda zogo metalam, nerute abara kaimeg giz abi detager, kega, Kole, dasmer, gaire au baker a gaire meta giz!

² Iesu abi detaut, kega, Ma dasmer gaire au meta giz abele? nole nerute baker ko igi tumem nerute baker, a nole abu kak.

³ Iesu tumem paser ge Oliua emeri, zogo meta op, Peteru a Iakobo a Ioane a Anederea gumik abim eutumer;

⁴ Ma keribi detagerare abele kerker ko tabarki abele gaire lu, a nalu atamelam abele gaire lu uridili ko tabarki?

⁵ Ege Iesu uiabim detaut, a ditimeda detager, kega, Mamoro dasmer nerute le uabi okardare;

⁶ Abelelam gaire le ko kara nei ge tabarki, a detager, kega, Kakanali Keriso; a gaire le didmirki.

⁷ Uaba barseda aserare, a barseda daratagereda, nole geum kak; abkoreb abele kekiam tabarki; mop uarem.

⁸ Abelelam nerute ged tekue obapit nerute ged, a nerute baselaia obapit nerute baselaia: a demali ko nagri uader ged, a memeig giz tabarki, a urker: abele ditimeda giz gaire asiassi.

⁹ Uaba mamoro dasmer; uiaba uaba kotem emarik; a uaba ipit sunago ge; a uaba tegared gauana giz a au opole giz ra op karielam, uiabim atamelam.

¹⁰ Abkoreb kekiam euangelia marau uiabim gaire ged uridili.

¹¹ Ese uiaba uaba tegared, a uaba emarida, uaba nole kekiam deraimeru a dikiapor na mer ko detager; abele gerger ua ko detager, abele mer uabi nakuar; a nole uaba detager, mamoro Lanar Zogo.

¹² Nerute keimer abara keimer emarida ko eumida, mokakalam aba abara ueremem; a uerem giz tekue obapit uiaba aba a apu, a ui emarida ko eumida.

13 Gaire le ko uabi derar kara neilam, ese nerute le erpei mop ge tabarki, E ko eded.

14 Ese uaba uite lu dasmer atkolam, Daniela perofeta emetu detager, tekue nug uteb ge, (le etage mamoro dikiapor,) kerker peik, uiaba gaire le Judaia emeri ko paser ge koreder:

15 Ese le meta tumge emeri, E nole muige meta abu kak, a nole abara meta badari ko nerute lu tais:

16 Ese le gedub emeri, E nole akomeret kak, tabara am uali tais.

17 Uaiiai uiaba gaire kosker kem kem, a uiaba nano emeli abele gerger giz!

18 Uaua ko bamereda, ueakai abele lu nole nur ge tabarki.

19 Abelelam ko au asiasi abele gerger giz, nole mokakalam ditimeda gaire lu Ade detagem pako irdi, a nole mokakalam niaiem.

20 Ese Opole nole tuprik abele gerger giz, nole le kak umele eded: Epe E tuprik abele gaire gerger, uiabelam gaire le depegili, E digmiri.

21 Ese nerute le uabi detager, kega, Dasmer, Keriso ike; a dasmer, Keriso idali; nole uaba abi asor kak:

22 Abelelam gaire Keriso bes, a gaire perofeta bes ko tabarki, a uiaba natomertare gaire atamelam a gaire adigir, ko didmirki gaire le depegili, ese umele.

23 Uaba ko dikiaporare: dasmer, kaka emetu uabi detagereda.

24 Keubu abele gaire gerger asiasi, lem au kupikup nole be kak, a meb nole meb gerib kak,

25 A kotor uer giz nabuda, a gaire kotor adigir deskerdi.

26 A uiaba ko dasmer Le la Uerem baz giz ge tedegemele, kemem au adigir a zorom zorom.

27 E tabara angela giz namarida, ko taraisare abara le giz emetu depegili foa uag peklam, ditimeda geseb, paikai ge pako kotor paikai ge.

28 Uaba ko ereuerem abele mer babisdarie abele suke: girkupi tam, a lam eperekili, uaba umele bar maike;

29 Mokakalam, ese uaba dasmer abele gaire lu tabarki, mamoro dikiapor, abele kerker maike abele gab te.

30 Ageakar, kaka uabi detager, kega, Nosik le peik nole abu kak, kekiam abele gaire lu tabarki.

31 Kotor ge a geseb ge ko abu; a kara mer giz nole abu kak.

32 Epe abele gerger pako haua iamdali le nole umer kak, angela giz kotor ge nole umer kak, a Uerem nole umer kak, epe Aba tepteb.

33 Uaba mamoro dasmer, a derser, a esorera- pare; abelelam uaba nole umer kak abele gerger.

34 Mokakalam le muriz gedim bakeam, tabara meta dekaerti, a tabara memeg giz sirdam nakuarare, a le gab te asesere abi mer tigri ko derser.

35 Abelelam ua ko derser: abelelam uaba nole umer kak abele gerger meta ra Kole ko tabarki, ese kikem, ese eip ki, ese kimiar faul ereretikri, ese idim ge:

36 Epe E sobkak tarabarakua, a uabi erdali uteid.

37 Abele mer kaka uabi detagereda, kaka uiabim gaire le uridili detagereda, Derser.

14

¹ Neis gerger iobaru, paseka akerare, a areto nole isi kak; zogozogo le giz, a aotale giz ko de-raineri abi terpei okardarem, a abi ipit eumida.

² A uiaba detager, kega, Nole abele ikeli uetpur ge, iaueakai abele ged ataperetlam.

³ E emri Bethania, muige Simona lepera ra meta, E emri leuer aroem, nerute kosker abim tabakeam nagri alabasa tarpor, muige muro ido lu; E emetu tarpor daraturumda, E abi kerem ge epaiteredelu.

⁴ Uader le urker, a mer mer, kega, Nalugelam abele muro epaitered?

⁵ Abelelam ese emetu terapei, abele bodoma-lam tumem thri handed denari a ko ikuarare gaire le lu kak. A uiaba abi urker.

⁶ Iesu detager, kega, Nole abi ataperet kak; nalugem uaba abi bamsili? abelelam E debe dorge karim ikeli.

⁷ Abelelam le giz nole lu kak no uabi dog emeri, uaba umele uiabim debe dorge nakeli abele gerger uaba laglag; epe kaka nole niai emeri uabi dog.

⁸ Kosker emetu ikeli abele lu E umele: E kekiam kara gem dedered kari natkobei.

⁹ Ageakar, kaka uabi detagereda, kega, Gaire ged uridili geseb ge ko euangelia marao, abele ko etomeret kosker ra dorge, mena ko dikiapor abim.

¹⁰ Nerute le, abele tuelf lelam, nei Iuda Isakar-iota, E bakeam uiabim zogozogo le giz, ko abi keserkeser uiabim.

¹¹ Uiaba asereda, uiaba sererge, a abi detager ko mani abi ikuar. E deraimeru ko Iesu keserkeser.

¹² Abele kekiam gerger areto nole isi kak, abele kerker uiaba paseka ipit, abara kaimeg giz abi detager, kega, Nade uteb mama lag keriba ko paseka ero?

¹³ E neis abara kaimeg giz namariklu, a uiabi detager, kega, Ua bakeamulei utebem, nerute le uabi obapit a nini tarpor erpei: abi irmilei;

¹⁴ E abele ge badari, uaba meta kemle detagereda, kega, Kole de detager, Nade suble uteb, kaka a kara kaimeg giz paseka eroarem?

¹⁵ Ege E uabi degeredi nerut au uteb kotor, emetu derser a eseger: a uaba ko derser keribim.

¹⁶ Abara kaimeg giz neis bakeamulei, a uteb ge tabarki, a erdarei mokakalam E uiabi daratager; epe uiaba paseka derser.

¹⁷ Kikem Iesu a tuelf le kei tabarkeda.

¹⁸ Uiaba baido, a leuer eroare, Iesu detager, kega, Ageakar, kaka uabi detagereda, kega, Nerute uabelam kari keserkeser, abele le kari dog eroli.

¹⁹ Uiaba ditimeda okasosok, a abi detager, kega, Nako kaka? a nerute kega, Nako kaka?

²⁰ Iesu uiabim detaut, kega, Nerute uaba tuelf lelam, le itili kari dog tanelu ge.

²¹ Le la Uerem bakeamulu mokakalam abim detali: epe uai ai abele le Le la Uerem keserkeser! debele abele le nole aosmer kak.

²² Uiaba eroare, Iesu areto ekao, a esoao, a itur a uiabi nakuarare, a daratagerare, kega, Tekao aroem: kara gem ike.

²³ E tanelu ekao, a esoao, a uiabi nakuarare: a ui uridili areem.

²⁴ E uiabi daratagereda, kega, Kara mam ike, abele kerkar gelar, epaitered uiabim gaire dor-dor le.

²⁵ Ageakar, kaka uabi detagereda, kega, Kaka nole iako aree kak abele uina turumlam, kekiam tabarki abele gerger kaka ko aree kerkar uina Ade ra baselaia ge.

²⁶ Uiaba emetu uedakiriare nerute ued, uiaba Oliua paserem bakeamuda.

²⁷ Iesu uiabi daratagereda, kega, Uaba uridili ko ezigmada karielam abele ki ge: emetu detali, kega, Kai le mamoe asesered ipit, epe mamoe giz kepu bamarida.

²⁸ Emetu kaka eded akaida, kaka kekiam bakeam Galalaiem a uaba keubu.

²⁹ Peteru abi detager, kega, Ese ui uridili marim ezigmada, kai nolea.

³⁰ Iesu abi detager, kega, Ageakar, kaka mari detager, kega, Thri ma ko kari nasared, abele ki ge, a kimiari faul nole neisi ereretikri kak.

³¹ E iako elele detager, kega, Ese kaka mari kemem naumilu, kaka nole mari asared kak. Uiaba uridili daratagereda abkoreb.

³² Uiaba nerute utebem tabaruda, nei Gethese-mané: E abara kaimeg giz daratagereda, kega, Uaba bameri ike, kai esorerapare.

³³ E Peteru, a Iakobo, a Ioane taraisare, a ditimeda ko okasosok, a nerkep okabatageli;

³⁴ E uiabi daratagereda, kega, Kara mar au asiasi bakedid abele eud; ua ge bamer, a derser.

³⁵ E kebi kebi bakeam, a seb ge etkobeilu, a esorerapare, ko abele haua abielam abi, ese umele.

³⁶ E detager, kega, Aba, Baba, mama umele gaire lu eseemuda; karielam ekao abele tanelu; epe nole kara lag ikeli mabara lag ikeli.

³⁷ E ko akomed a uiabi erdali uteid, E Peteruim detager, kega, Simona, ma uteid? ma nole saserim kak ko derser netat haua ge?

³⁸ Ua ko derser, a esorerapare, ueakai uaba nole mirem barot: lamar saserim, epe gem gebgeb.

³⁹ Iesu iako bakeam ko esorerapare, a detager abele netat mer.

⁴⁰ E iako takomeda, a uiabi erdali iako uteid, abelelam uiaba pone beber, a uiaba umer kak nerute mer abi detaut.

⁴¹ Iesu thri tabakeam, a uiabi daratagereda, kega, Ua ko uteid, a nerbazi; sina, haua ike; dasmer, emetu Le la Uerem keserkeser uiabim gaire uit le giz.

⁴² Bako, mi nabakeuare; dasmer, E maike le kari keserkeser.

⁴³ E abele mer detager, sobkak Iuda tabarki, nerute le tuelf lelam, a abi kemem gaire le uridili teibur tulik a gabagaba taraisare, uiabelam zogozogo le giz, a aotale giz, a au le giz.

⁴⁴ Abele le abi keserkeser uiabim daratagereda nerute atamelam, kega, Le kaka abi eskos, E dali; uaba abi erpeirare, a elele tegardare.

⁴⁵ E sobkak tabarki, E abim bakeam, a abi detager, kega, Rabi ae; a abi eskos.

⁴⁶ Uiaba abim tag giz itrimuda, a abi terpei.

47 Nerute le uiabelam tekue, a teibur aososo tulik iseda, a kole zogozogo le giz ra memeg le ipit, a abara laip ismilu.

48 Iesu uiabi daratagereda, kega, Nako, ua tabakeuare karim eruam le ise, a gaire teibur aososo tulik, a gaire gabagaba kari tais?

49 Kaka uabi dog gaire gerger giz zogo meta ge okadeskeda, uaba nole kari arpeir kak; bakedilu eski abele zogo mer detali.

50 Uiaba uridili abi dekaerti, a koreder bameri.

51 Nerute makeriam abi irmili, E aole a uali lino batkam: a makeriam giz abi erpeirare;

52 E uali lino igilu, a aole uiabelam koreder ge bakeamulu.

53 Uiaba Iesu datkimuardare abim kole zogozogo le giz: gaire kole zogozogo le giz netate gedim abim, a aotale giz.

54 A Peteru muriz ge abi irmili, abele uteb meta ge, kole zogozogo le giz ra meta; E kemem emeri uiabi dog memeg le giz, a abi ur ge gebaugeli.

55 Gaire kole zogozogo le giz, pako gaire tarim le giz deraimerare abielam nerute tonar, ko abi ipit eumilu; epe nole ardar kak.

56 Dordor le abielam bes mer detager, a dordor tonar mer uiaba detagerare.

57 Uader le bako, a abielam bes mer detagerare, kega,

58 Keriba asereda E detager, kega, Kaka, ko abele meta ezageri, tagu ikeli, a thri gerger kaka ko nerut ikeli, a nole tagu ikeli.

59 Epe nole netate gab uiaba mer detagerare.

60 Abele kole zogozogo le giz eipu tekue, a Iesuim eutumer, kega, Nako ma nole mer etkalu? nako mer uiaba tais marielam?

61 Epe E bazeguar, a nole mer kak. Ege kole zogozogo le giz iako abim eutumer, a abi detager, kega, Ma Keriso nali, Aosperera ra Uerem me?

62 Iesu detaut, kega, Kakanali; uaba ko dasmer Le la Uerem adigir tuter tag emeri, a ko tabakeam gaire kotor baz giz ge.

63 Abele kole zogozogo le giz tababu tabara am uali etoat, a detager, kega, Epe nalu nerute merume le?

64 Uaba emetu asereda Adim op mer detagereda; nalu uaba dikiapor? Uiaba uridili mer nakesmur, kega, Abkoreb E ko eumida.

65 Uader le ditimeda abi mos itu, a abara op demdare, a abi detapiare, a abi detager, kega, Ma ko perofeta; a memeg le giz abi ipitare tag de.

66 A Peteru lokod ge emeri, nerute neur, abele kole zogozogo le giz ra memeg, tabakeam;

67 E Peteru erdali ur ge gebaugeli, E abi dasmer, a detager, kega, Mama nerute le kemem Iesu.

68 Epe E asared, kega, Kaka nole umer kak, kaka nole opasereret kak abele lu ma detager. E osmeda abele maisu ge; a kimiar faul ereretikri.

69 Neur memeg le iako abi erdali, a ditimeda detager uiabim akuelem, kega, E dali nerute uiabelam.

70 E iako asared. Nole uapum kak, gaire akuelem iako abi detager, kega, Ageakar ma nerute le uiabelam, ma Galilaia le, ma uiabim netate kodomer.

⁷¹ Peteru ditimeda adud mer egali, kega, Kaka nole umer kak abele le uaba detager.

⁷² Kimiar faul neisiem ereretikri. A Peteru dikiapor abele mer Iesu abi detager, kega, Kimiar faul nole neisi ereretikri, ma ko thri kari nasared. E dikiapor, a E bazoli.

15

¹ Ege idim ge gaire kole zogozogo le giz, a au le giz, a aotale giz, pako gaire tarim le giz ko mer atagere; uiaba emetu Iesu didbare, uiaba abi egared, a Pilato nakuar.

² Pilato abi eutumer, kega, Nako mama Iudaia le giz ra Opole? E abi detaut, kega, Eko mama detager.

³ Zogozogo le giz gaire mer abi okadiridili.

⁴ Pilato iako abi eutumer, kega, Ma nole ataut kak? dasmer gaire mer uiaba mari naridili.

⁵ Epe Iesu nole ataut kak; abelelam Pilato au damred.

⁶ Uetpur kerker E uiabim emarida nerute le didbar, uiaba laglag.

⁷ Nerute le nei Barabasa, didbare gaire le opole basardare, uiaba le ipit eumilu abele kerker opole asaredelam.

⁸ Gaire le uridili uiaba elele ereretikri, a ditimeda abim eutumer ko uiabim ikeli mokakalam ababur ge ikeli.

⁹ Pilato uiabim detaut, kega, Nako, uaba laglag kaka uabi dakuarare Iudaia le giz ra Opole?

¹⁰ Abelelam E umele uiaba, gaire kole zogozogo le giz, Iesu nakuar kurablam.

11 Gaire kole zogozogo le giz gaire le namarida, ko detager, kega, Barabasa keribim emarik.

12 Pilato iako uiabim detaut, kega, Nalu lu uaba lagelag kaka ikeli abim, abele le uaba nei atker Iudaia le giz ra Opole?

13 Uiaba iako ereretikri, kega, Abi satauroem.

14 Pilato uiabim detagereda, kega, Nalu adud Eikeli? A uiaba elele ereretikri, kega, Abi satauroem.

15 Pilato lagelag gaire le lakub ra nerkep ko sererge, E Barabasa uiabim namarida, a emetu Iesu damrik, E abi ikuar ko satauroem.

16 Gaire ares le abi kebi metaem tegared, nei Praitorio, a ares le nosik taraisare.

17 Uiaba abi mamam am uali amer, zegerzeger lager euer aperem, a abi kerem dameare;

18 A ditimeda ko abi detager, kega, Uaiiai, Iudaia le giz ra Opole!

19 Uiaba abara kerem pater de ipit, a abi mosu iduare, a kokomamu, a abi erkepsam.

20 Uiaba emetu abi neg degarare, uiaba mamam am uali igi, a abara am uali ami, a abi adige tegared ko satauroem.

21 Uiaba nerute le Kurene namarida abara satauro kodrom, Simona nei, E uiabi dog maike bakeuda sumezlam, abele le Alesandero a Rufa ra aba.

22 Uiaba abi tegared abele uteb Gologotha, tonar abele, Kerem lid ra uteb.

23 Uiaba abi ikuar uaina etaperet okakis muro: epe E nole erpei kak.

24 Uiaba emetu abi satauroem, uiaba abara gaire am uali uaderapei, a luglug ikeli, nete de ekadare.

25 Opem abele haua thri, uiaba abi satauroem.

26 Abele jauali detali abara tonarlam etomeret, kega, IUDAIA LE GIZ RA OPOLE.

27 Neisi eruam le kemem abi dog satauroem; nerute le abi tuter tag, a nerute le abi ber tag.

28 Bakedida iski abele zogo mer emeret detali, kega, Netat abim babei kemem uite le giz.

29 Gaire le satauro seb ge nakasir desauersili, a kerem dirilare, kega, Ma zogo meta ezageri, a thri gerger ko ikeli,

30 Ma mabu idigiri, a sataurolam uatabu.

31 Mokakalam gaire kole zogozogo le giz abi desauersili, a aotale giz, kega, E uader le idigiri, a nole umer kak tababu idigiri.

32 Debele Keriso, Isaraela le giz la Opole, peidi uatabu sataurolam, keriba abi dasmer, a oituli. Abele neisi le kemem abi satauroem abi desauersili.

33 Opem haua sikes, kupkup ged ge uridili bakedilu abele nain haua.

34 Abele nain haua Iesu au ereretikri, kega, Eloi, Eloi, lama sabakethani? tonar abele, Kara Ade, kara Ade, nalugem ma kari nakaerti?

35 Uader le bako, aserare, uiaba detagereda, kega, Dasmer, E Elia dabgeri.

36 Nerute le koreder, sap uinega akmei, a pater ge dasirilu, a abi ikuar ko eree, a detager, kega, Sina; mi dasmer, Elia ko uatabu abi tatkurda.

37 Iesu emetu au ereretikri, Epe namarid tabara lamar.

38 Abele uali demed zogo meta muige tababu batoot, kotorlam a giz ge,

39 Abele kerem le, asesered netate handed ares le, abim opem tekue, erdalü tonar abara eumida, E detager, kega, Ageakar, Ade ra Uerem idali.

40 Gaire kosker giz tekue muriz ge dasmer; uiabi dog Maria Magdalena, a Maria kebi Iakobo ra apu, a Iose, a Salome;

41 Uiaba, Iesu irmilare E Galilaia ge, a abim dorge ikeli; a gaire kosker abi kemem irmilare Ierusalem.

42 Kikem, abele derser gerger, sabath iuaokaer,

43 Iosefa Arimathia le tabarki, le umele, a ekosili, E nerute le Ade ra baselaia naokaili; E saserim Pilatoim bakeam, a Iesu ra gem damos.

44 Pilato karom ese E eumida: E kerem le, asesered netate handed ares le, dabgeri, a abi eutumer, kega, Nako, emeret E eumida?

45 E asoli kerem lelam, E Iesu ra gem nakuar abim Iosefa.

46 E uali lino mog terapei, a E tatkurda, a uali lino de abi sopem, a baker kur daiui abi azeriklu; a au baker erparik gab dimilu.

47 Maria Magdalena, a Maria, Iose ra apu dasmer abele uteb abi ikedilu.

16

1 Abele sabath iobaru, Maria Magdalena, a Maria, Iakobo ra apu, a Salome debe laglag lu terapei, uiaba ko Iesu ra kem dedered.

2 Uiaba aoem tabarki bane ge, abele kekiam gerger sefen, kerker lem eupamada.

³ Uiaba mer atager, kega, Nete de meribim baker erparik abele kur telam?

⁴ Ui dasmer, a erdali baker emetu kei erparkei: au baker peik.

⁵ Uiaba aoem barot, a makeriam dasmer tuter pek emeri, zazer uali ame; uiaba bazigmaret.

⁶ E uiabim detager, kega, Uaba azigmaret kak: uaba Iesu Nazareta le deraimer, abele le emetu satauroem; E iako eded akaida; E nole ike; dasmer abele uteb uiaba abi ikedi!

⁷ Ua bakeamlam, a abara kaimeg giz a Peteruim detager, kega, E kekiam bakeamulu uabi opem Galilaiaem; uaba ko abi erdali abele uteb, mokakalam ababur ge E uabim detager.

⁸ Uiaba sobkak teosmeda, a koreder aolam; uiaba durdur, a orida: epe uiaba nole nerute le mer atager kak; abelelam ui geum ge.

⁹ Iesu emetu eded akaida idim ge, abele gerger kekiam sefen, E Maria Magadlena kekiam paret kak osmeda, E sefen demoni ditrida abele koskerlam.

¹⁰ E dali bakeamulu, a uiabim gaire le Iesu ra kemem natomelu, uiaba noge okasosok a bazoli.

¹¹ Uiaba asereda Iesu eded akaida, pako E kosker paret kak osmeda, uiaba nole oatur kak.

¹² Abele gaire lu iobaru, Iesu paret kak osmeda nerute tonar uiabim neisi uiaba boai, ui gab ge gedub bakeam.

¹³ Ui bakeam a uiaba boai natomelu; epe uiaba ui nole oatur kak.

¹⁴ Keubu, Iesu paret kak osmeda uiabim gaire elefen le, uiaba aroem; E uiabi nakereda nole oatur kaklam, a kelarkelar nerkep, abelelam

uiaba nole oatur kak abele gaire le abi dasmer E eded akaida.

¹⁵ Ege E uiabim detagereda, kega, Ua bakeuare gaire ged narida uridili, a ko euangelia marao uiabim gaire le uridili.

¹⁶ Ese nerute le oituli, a emetu bapataiso, E ko eded: ese nerute le nole oatur kak, E ko eumilu.

¹⁷ Abele gaire atamelam ko irmilare gaire le oituli: uiaba ko demoni giz dituaki kara nei de; uiaba ko detager uader ged ra kodomer;

¹⁸ Uiaba ko tabu giz erpei, ese uiaba eudeud lukup erehi, uiaba nole eud kak; uiaba ko tag giz gim le giz dikmerik, uiaba nadgirauem.

¹⁹ Iesu Opole emetu uiabim daratagereda, iako abim bakuarda kotorem, a Ade ra tuter tag emeri.

²⁰ Ui bakeuare, a marao gaire ged uridili, Opole uiabi kemem dorge, a abele mer ageakarem, gaire adigir de irmili. Amen.

Meriam Mir Bible
The Four Gospels in the Murray Island or Mer
Language of Australia

Public Domain

Language: Meriam Mir (Meriam)

This Bible translation is in the Public Domain (not copyrighted) due to copyright expiration.

2023-04-03

PDF generated using Haiola and XeLaTeX on 22 Feb 2024 from source files dated 31 Aug 2023

333cd95a-a1c6-5b40-8ad9-641bf00decad